

starogradski

OPĆINA STARI GRAD
SARAJEVO



MUNICIPALITY OF STARI
GRAD SARAJEVO

haber

BESPLATAN PRIMJERAK • mart 2012. broj 13.

● **Rekonstrukcija tri
spomenika kulture**

● **Intervju:
Amina Deljković**

● **Požar uništio
desetak trgovki**

OČIŠĆENO 200 ULICA

Foto: Nedim Grabovica

- 2-3 Rekonstrukcija tri spomenika kulture
- 4-5 Očišćeno 200 ulica
- 7 Strategija za mlade
- 8 Sanacija dijela Ulice Ferhadija
- 9 Smještaj za 11 interno raseljenih porodica
- 10-11 Intervju: Amina Deljković, pomoćnica načelnika
- 12 Požar uništio desetak trgovki
- 14 Stipendije za starogradske studente i srednjoškolce
- 18 Predstavljamo MZ Kovači
- 23 1001 starogradski biser: „Nastanak prvih tekija (musafirhana...) u Sarajevu“



Impressum

- Izdavač:** Općina Stari Grad Sarajevo
- Tiraž:** 2.000
- Pripremili:** Almedina Porča
Selma Velić
Alma Imamović
Alija Ibrović
Džavid Katica
- DTP:** Safet Mališević
- Fotografije:** Zijad Lokvančić
- Štampa:** DES d.o.o. Sarajevo
- Adresa:** Zelenih beretki br. 4
71000 Sarajevo
- web:** www.starigrad.ba
- e-mail:** info@starigrad.ba
- Tel./fax:** +387 33 282 385
+387 33 217 916

Projekti

Rekonstrukcija tri spomenika kulture

Za sanaciju Saburine kuće, Vratničkog bedema i Latinske ćuprije u budžetu Općine Stari Grad Sarajevo obezbijedeno 130.000 KM



Zamjena kamenih ploča na Latinskoj ćupriji

Općina Stari Grad će ove godine sa oko 130.000 KM finansirati rekonstrukciju tri spomenika kulture, koja se nalaze na njenoj teritoriji.

Planirana je sanacija Saburine kuće, jedne od najstarijih kuća u Sarajevu, koja je proglašena nacionalnim spomenikom, Vratničkog bedema i Latinske ćuprije. Sva tri projekta bit će realizovana u saradnji sa Zavodom za zaštitu kulturno-historijskog i prirodnog naslijeđa Kantona Sarajevo.

Za sanaciju Saburine kuće u budžetu

je planirano 75.000 KM. Idejni projekat za sanaciju devastiranog enterijera ove kuće je već završen.

Općina Stari Grad je i prošle godine sa 91.000 KM finansirala sanaciju sjevernog dijela Vratničkog bedema. Za ovaj projekat u općinskom budžetu u 2012. godini planirano je 40.000 KM.

Sanacija Latinske ćuprije podrazumijevat će zamjenu oštećenih ploča na ovom mostu. Projekat bi trebalo da košta oko 10.000 KM.

"Rekonstrukcijom Saburine kuće, jedne od najstarijih kuća u Sarajevu, želimo napraviti prostor za organizovanje

Latinska ćuprija

Latinska ćuprija, koja je od 1918. do 1992. godine nosila naziv Principov most, je jedan od najstarijih sarajevskih mostova. Ovaj most mijenjao se vremenom, od prvobitno drvenog do mosta današnjeg izgleda.

Prvi drveni most, koji se spominje u popisu bosanskog sandžaka iz 1541. godine, sagradio je sarač Husein. Kameni most izgradio je sarajevski ajan Ali Ajni-beg 1565. godine.

Most je povezivao desnu obalu Miljacke s dijelom grada gdje je stanovalo kršćansko stanovništvo, koje je u narodu bilo poznato kao Latinluk, pa je tako i dobio ime Latinska ćuprija. U blizini mosta 1914. godine Gavrilo Princip izvršio je atentat na prestolonasljednika Austro-Ugarske monarhije nadvojvodu Franju Ferdinanda i njegovu suprugu Sofiju vojvotkinju Hohenberga. Most je sve do agresije na BiH nosio naziv po Gavrilu Principu.

Saburina kuća

Saburina kuća je prvobitno bila izgrađena kao stambeni kompleks koji se sastojao od više objekata: haremluka (ženska kuća) i selamluka (muška kuća), uz koji se nalazila velika štala. Svaki od ovih objekata imali su po dvije avlije. Danas je od čitavog kompleksa Saburine kuće ostao samo jedan objekat, tzv. muški dio s dvorištem, koji je sagrađen oko 1750.-e godine. Ženski dio kuće je potpuno propao nakon 1918. godine. Neki dijelovi enterijera iz ovog objekta preneseni su u etnografski dio Zemaljskog muzeja u Sarajevu.



Za Saburinu kuću 75.000 KM

prigodnih manifikstacija", istakao je Ibrahim Hadžibajrić, načelnik Općine Stari Grad.

Podsjetio je kako će sanacija Latienske ćuprije biti jeftinija zahvaljujući firmi koja je ploče za ovaj most ponudila po znatno nižoj cijeni od one na tržištu.

"Očekujemo da bi rekonstrukcija sva tri objekta trebalo da bude završena u avgustu, ove godine", najavio je načelnik Hadžibajrić.

Za rekonstrukciju sva tri objekta od kulturno-historijskog značaja novac će obezbijediti Općina Stari Grad, a nosilac aktivnosti, odnosno realizator projekta bit će Zavod za zaštitu kulturno-historijskog i prirodnog naslijeđa KS.

Vratnički bedem

Izgradnja Vratničkog bedema započeta je 1729. godine na inicijativu tadašnjeg bosanskog namjesnika vezira Ahmed-paše Rustempašića Skopljaka. Nakon požara koji je zadesio Sarajevo pri provali vojske Eugena Savojskog 1697. godine, Ahmed-paša izdao je naredbu prema kojoj je odbrambeni zid trebalo da bude dug jedan sahat hoda, debeo dva metra, a visok deset aršina. Namjera mu je bila da bedemom opase 450 kuća i prazan prostor za izgradnju još toliko novih kuća. Pozvao je iz Dubrovnika pet lagumdžija (minera) i pet čerahora (tvrđavskih zidara) da rukovode radovima, koji su s prekidima trajali 12 godina i završeni su 1739. godine.

Vratnički grad sa svojim bedemima, kapijama i kapi-kulama daje karakterističnu siluetu i svojevrsan pečat historijskoj jezgri Sarajeva.



Nastavak rekonstrukcije Vratničkog bedema

Elementarna nepogoda

Priča s naslovne strane

Obilne snježne padavine uzrokovale kolaps u starogradskim

Očišćeno 200 ulica

Područje Starog Grada čistilo je 250 dobrovoljaca, studenti, penzionisani vojnici, uposlenici GRAS-a, Općine i mještani Mjesne zajednice Ćuništa

Glavne starogradske saobraćajnice, dan nakon obilnih snježnih padavina, bile su prohodne za pješake i vozila.

Snijeg je tokom dvije sedmice, koliko je trajalo stanje elementarne nepogode, očišćen s više od 200 ulica i stepeništa i oko 150 objekata. Prohodno je bilo 140 ulica, više od 30 stepeništa i trotaoara,

bili pripadnici Dobrovoljne vatrogasne brigade „Vratnik“ i Policijske stanice Logavina. Snijeg su dobrovoljni čistili članovi Studentskog parlamenta Univerziteta u Sarajevu, Udruženja penzionisanih vojnika Oružanih snaga BiH, uposlenici GRAS-a, Općine, kao i 50 mještana Mjesne zajednice Ćuništa iz Olova.

Angažman vatrogasaca

Pripadnici Dobrovoljne vatrogasne brigade „Vratnik“, tokom vanrednog stanja, imali su više od 150 intervencija. U saradnji s predstavnicima Operativnog centra Civilne zaštite Općine Stari Grad vatrogasci su skidali snijeg s krovova javnih i privatnih objekata, te transportovali nekoliko bolesnih osoba do zdravstvenih ustanova.

Prema izvještaju DVD „Vratnik“ vatrogasci su, u skladu s prioritetima, uklonili snijeg s krovova 12 javnih i 118 privatnih objekata.

Do punkta Hitne pomoći i Kliničkog centra Univerziteta u Sarajevu transportovali su šest pacijenata.

Školski objekti

Snijeg i snježni nanosi uzrokovali su manju materijalnu štetu na objektima osnovnih škola "Mula Mustafa Bašeskija" i "Edhem Mulabdić", istakla je Amina Deljković, pomoćnica općinskog načelnika za obrazovanje, kulturu i sport.

Kod ostalih sedam školskih objekata



Ulice i stepeništa čistilo 250 dobrovoljaca

nije evidentirana materijalna šteta.

Deljkovićeva je istakla kako je nastanak štete spriječen zahvaljujući brzom reakciji nadležnih u Općini Stari Grad.

„Zahvaljujući brzom intervenciji načelnika Općine Stari Grad, koji je u-



Zaštitna mreža na objektu u Ul. Nadmejdjan 7

kao i svi mostovi koji se nalaze u Starom Gradu.

Na inicijativu Ibrahima Hadžibajrića, načelnika Općine Stari Grad, 4. februara angažovano je 250 ljudi koji su do 19. februara čistili snijeg sa starogradskih ulica i stepeništa.

Svoj doprinos u raščišćavanju snijega dali su predstavnici i uposlenici firmi „Medimpex“, „Klico trans“ i „Famus gradnja“.

Općini Stari Grad na raspolaganju su



Prokisle učionice OŠ "M.M. Bašeskija"

klanjanje snijega sa školskih objekata ocijenio prioritarnim, škole su prošle bez velike štete“, kaže Deljkovićeva.

Snijeg s krovova školskih objekata skidali su alpinisti Adnan Ćatić i članovi Udruženja ekstremnih sportova „Red Point“ i pripadnici Dobrovoljne vatrogasne brigade „Vratnik“. Snijeg s

ulicama i načinile manju materijalnu štetu na školskim objektima



područja koja su im bila dostupna skidali su uposlenici osnovnih škola.

Zaštita ruševnih objekata

Općina Stari Grad je, s ciljem sprječavanja urušavanja i propadanja objekata pod težinom snijega, intervenisa-

ocijenjene kritičnim.

Općinske službe postavile su zaštitnu mrežu oko objekta u Ulici Nadmejdian broj 7, a potpurnu konstrukciju na objektu u Ulici Prijeka česma broj 22.

Veliki snježni nanosi uzrokovali su obrušavanje hastahane – prve bo-

vljena potporna konstrukcija i uklonjeni su njegovi oštećeni dijelovi.

Vlasnici privatnih objekata u ulicama Sagrdžije 30 i Megara 44, na poziv Općine, uklonili su dijelove koji su se obrušavali.

Zbog snijega urušio se i dio objekta u Ulici Brdo sokak 4-6. Općina je uklonila ruševne dijelove ovog objekta kao i oštećeni gromobran sa objekta u Ulici Alifakovac broj 8.

Opasnost za prolaznike je predstavljao i stari objekat u Ulici Pastrma. Zbog dotrajalosti na ulicu se počeo obrušavati cokleni zid. Ovaj objekat nalazi se u privatnom vlasništvu. Iako je po zakonu vlasnik dužan da otkloni sve nepravilnosti Općina je reagovala i u ovom slučaju, kako bi zaštitila prolaznike.



Mašinsko čišćenje Bašćaršije

la na nekoliko lokacija.

Služba za inspeksijske poslove Općine Stari Grad, u saradnji s nadležnim službama, obišla je 42 lokacije koje su

lnice na ovom području u Ulici Halilbašića, koja je proglašena spomenikom kulture. Na objekat je posta-



Objekat u Ul. Prijeka česma 22

Općinsko vijeće

35. sjednica

Općinskog vijeća

Budžet Općine Stari Grad za 2012. godinu iznosi 17,528.000 KM i u odnosu na nacrt uvećan je za 397.000 KM.

Budžet u ovom iznosu usvojen je na 35. sjednici Općinskog vijeća Stari Grad, koja je održana 28. decembra, 2011. godine.

Prihodi od poreza u 2012. godini iznosit će 2,018.000 KM, a neporezni 10,455.500 KM. Od neporeznih prihoda 7,260.500 KM otpada na prihode od poduzetničkih aktivnosti i imovine, a 3,195.000 KM na naknade takse i prihoda od pružanja javnih usluga. Tekuće potpore iznose 5,054.500 KM. Tekući rashodi u 2012. godini iznosit će 11,967.400 KM, a kapitalni transferi i izdaci 5,560.600 KM.

Mustafa Lačević, dopredsjedavajući Općinskog vijeća Stari Grad, istakao je kako je budžet u odnosu na nacrt uvećan za dva odsto, što je rezultat minimalnih zahtjeva građana.

„Ovo potvrđuje da je budžet u 2011. godini kvalitetno implementiran i da je Općina Stari Grad realizirala veliki broj zahtjeva građana“, pojasnio je Lačević, naglasivši i činjenicu da će budžet za narednu godinu biti „napunjen“ uglavnom vlastitim novcem Općine Stari Grad.

Na sjednici Općinskog vijeća Stari Grad usvojen je program rada načelnika za 2012. godinu, informacija o njegovom radu tokom 2011. godine, kao i nekoliko odluka o prodaji poslovnih prostora zakupcima.



Mustafa Lačević,
dopredsjedavajući OV

36. sjednica

Općinskog vijeća

Općinsko vijeće Stari Grad jednoglasno je usvojilo Odluku o zonama sanitarne zaštite i zaštitnim mjerama za izvorišta „Sarajevka pivara“. Ovom odlukom propisana je jedna izvorišna zona i zaštitne mjere od onečišćenja ove vode. Na 36. sjednici Općinskog vijeća Stari Grad, koja je održana 26. januara, 2012. godine, konstatovano je kako je kvalitet vode izvrstan, iako se izvorište nalazi u urbanom dijelu grada.

Prema ovoj odluci „Sarajevska pivara“ je dužna da svaki dan vodu nosi u nadležne laboratorije na analizu.

U sklopu ovog izvorišta nalaze se nepropusne stijene debele više od 130 metara, pa je praktično njegovo zagađenje nemoguće. Ovo izvorište 1881. godine otkrio je austrijsko-češki istraživač. U tom periodu na Kovačima Češka je imala svoju pivaru i borila se s nedostatkom vode za piće. Istraživač je na ovoj lokaciji pronašao vodu na 139 metara dubine.

Na 36. sjednici vijećnici su jednoglasno podržali i Program korištenja javnih površina na području Općine Stari Grad, Program rada Općinskog vijeća Stari Grad za 2012. godinu, te program rada Pravobranilaštva Općine Stari Grad za 2012. godinu.

Nakon završene konkursne procedure vijećnici su u zakup dodijelili poslovne prostore u Kvadrantu XII. Poslovni prostor od 23,69 metara kvadratnih pod zakup je dodijeljen firmi „Iper“, a prostor od 39,40 metara kvadratnih „Sarajevskoj pivari“. Cijena metra kvadratnog za oba zakupca iznosi 26 KM.



Općinsko vijeće

37. sjednica

Općinskog vijeća

Vijećnici Općinskog vijeća Stari Grad na 37. sjednici, održanoj 29. februara, 2012. godine, jednoglasno su podržali zaključak o pokretanju postupka za izmjenu Statuta Općine Stari Grad.

Izmjene Statuta inicirali su načelnik Općine i Komisija za propise i Statut Općinskog vijeća. Izmjene koje je inicirao načelnik odnose se na izbor savjeta mjesnih zajednica. Po sadašnjim odredbama mandat savjeta mjesnih zajednica traje dvije godine i ovakvo rješenje u praksi se pokazalo nepraktično. Izmijenjeni Statut predviđa da mandat savjeta mjesnih zajednica traje četiri godine. Zbog ove inicijative vijećnici su jednoglasno usvojili Odluku o produženju mandata članovima savjeta mjesnih zajednica na području Općine Stari Grad.

Druge izmjene, koje je inicirala Komisija za propise i Statut, odnosit će se na usklađivanje Statuta sa odredbama Zakona o principima lokalne samouprave FBiH. Jedna od izmjena tretira usvajanje općinskog budžeta. Po Zakonu predviđeno je da Općinsko vijeće većinom glasova usvaja budžet, dok je Statutom određeno da



Ibrahim Hadžibajrić,
načelnik Općine

ovaj dokument za prolaz mora imati dvotrećinsku većinu.

Većinom glasova vijećnici su usvojili i zaključak o izmjenama i dopunama Odluke o načinu raspodjele sredstava namijenjenih za rad političkih stranaka. Izmjene će se odnositi na članove Odluke koji regulišu dodjelu novca samostalnim vijećnicima. Ovakav zaključak usvojen je nakon rasprave o izvještaju o trošenju novca kojeg su podnijeli samostalni vijećnici Općinskog vijeća Stari Grad.

Na ovoj sjednici predstavljene su aktivnosti Štaba civilne zaštite Općine Stari Grad od 3. do 16. februara. Usvojen je zaključak da Štab i Služba civilne zaštite sačine novi operativni plan u slučaju prirodne i druge nepogode. Zbog efikasnih odluka i pravovremenog djelovanja predstavnici Štaba civilne zaštite zahvalnice su uručili Ibrahimu Hadžibajriću, općinskom načelniku, Sakibu Avdićbegoviću, pomoćniku načelnika za boračko-invalidsku zaštitu i Dževadu Mandžuki, šefu Sektora za tehničke poslove.

Strategija za mlade

Realizacijom projektnih ciljeva u oblasti zapošljavanja, socijalne politike, obrazovanja, kulture i sporta i informisanja bit će riješena goruća pitanja mladih u Općini Stari Grad.

Projektni ciljevi u ovih pet oblasti definisani su u Strategiji za mlade Općine Stari Grad 2012.-2017. godine koja je jednoglasno usvojena na sjednici

Obrazovanje, kultura i sport

Neformalno obrazovanje jedan je od načina rješavanja problema mladih u oblasti obrazovanja. Na ovaj način Općina Stari Grad nastoji da edukuje mlade u različitim vidovima neformalnog obrazovanja. Planirana je također i edukacija pripadnika manjinskih naroda, prije svega o njihovoj vlastitoj kulturi, tradiciji i običajima.

U oblasti kulture i sporta Općina Stari Grad nastojat će obnoviti i povećati sportski mobilijar na igralištima i sportskim terenima, ali i povećati stepen znanja mladih o kulturno-historijskoj baštini. Za ove oblasti potrebno je 295.000 KM, odnosno 180.000 KM za obrazovanje i 115.000 KM za kulturu i sport.

Općinskog vijeća, održanoj 29. februara, 2012. godine.

Alma Imamović, koordinator za izradu Startegije, istakla je kako je ovo prvi općinski dokument koji tretira probleme mladih.

"Startegija je urađena i donesena na osnovu Zakona o mladima FBiH, koji je usvojen 2010. godine. U Strategiji su de-

Zapošljavanje

Nezaposlenost je gorući problem mladih u Općini Stari Grad. Ovaj problem slijedi neinformisanost mladih o potrebama tržišta rada, načinu traženja posla, kao i pisanju kvalitetne biografije. Općina Stari Grad, u skladu sa svojim nadležnostima, organizovanjem radionica, seminara, te praktičnih vježbi, nastojat će riješiti ove probleme. Za ovaj segment Strategije za mlade neophodno je oko 70.000 KM.

Socijalna politika i informisanje

Mladi su upozorili na veliki broj njihovih vršnjaka koji konzumiraju cigarete, alkohol, pa i opojne droge. Zbog toga će Općina Stari Grad, u saradnji s partnerima, organizovati radionice o štetnosti konzumiranja cigareta, alkohola i droga. U ovim radionicama bit će obuhvaćen i segment nasilničkog ponašanja mladih u zajednici u kojoj žive.

Rezultati istraživanja su pokazali da su mladi nedovoljno informisani o načinu funkcionisanja lokalne zajednice, ali i o svim ostalim segmentima društvene zajednice. S ciljem što boljeg informisanja mladih bit će formirano Vijeće mladih Općine Stari Grad.

Za ove oblasti potrebno je 115.000 KM: 75.000 KM za socijalnu politiku i 40.000 KM za informisanje.

terminirani problemi mladih i ponuđena su adekvatna rješenja za svaku oblast", rekla je Imamovićeva.

Na osnovu istraživanja koje je provedeno među mladima na području Starog Grada definisani su problemi ove populacije u oblasti zapošljavanja, socijalne politike, obrazovanja, kulture i sporta i informisanja. Općina Stari Grad, iako nije imala strateški dokument, ranije je finansirala projekte mladih čiji je cilj bio poboljšanje njihovog položaja u društvu.



Alma Imamović

Na osnovu istraživanja i rezultata formirane su radne grupe koje su u svakoj od pet oblasti ponudile rješenja.

Strategija za mlade napravljena je za period od pet godina i njena realizacija trebalo bi da košta 480.000 KM.

Za poljoprivredu 100.000 KM



Za plastenike 50.000 KM

Općina Stari Grad je u budžetu za 2012. godinu obezbijedila 100.000 KM za finansiranje projekata iz oblasti poljoprivredne proizvodnje.

Grant za stimulisane plasteničke proizvodnje za duplo je veći u odnosu na 2011. godinu. Za stimulisane plasteničke proizvodnje u budžetu Općine Stari Grad je obezbijeđeno 50.000 KM, a poljoprivredne proizvodnje 20.000 KM. Po 5.000 KM osigurano je za projekte iz oblasti pčelarstva i veterinarstva, a po 10.000 KM za projekte iz oblasti stočarstva i stimulisanja uzgoja voća.

Kao i prethodnih, i ove godine projekti iz oblasti poljoprivredne proizvodnje biće realizovani posredstvom Službe za privredu.

Koncesije na sudu

Općina Stari Grad uputila je Ustavnom sudu FBiH apelaciju za preispitivanje ustavnosti Zakona o koncesijama Kantona Sarajevo.

Općini Stari Grad pridružile su se općine Novo Sarajevo i Vogošća, dajući svoju saglasnost na podnošenje apelacije Ustavnom sudu FBiH.

Odluka o pokretanju tužbe pred Ustavnim sudom FBiH donesena je nakon što je u Skupštini KS krajem oktobra, prošle godine usvojen Zakon o koncesijama, a koji direktno krši prava općine po osnovu nekoliko domaćih zakona i međunarodnih povelja. Iz Općine Stari Grad upozoravaju kako je Zakonom o koncesijama KS povrijeđeno pravo općina na lokalnu samoupravu jer im je uskraćeno pravo raspolaganja imovinom.

Kanalizacija u Ulici Alije Nametka



Nova mreža u dužini od 110 metara

Počelo je postavljanje nove kanalizacione mreže u Ulici Alije Nametka.

U ovoj ulici bit će postavljena nova fekalna kanalizaciona mreža i to u dužini od oko 110 metara.

U sklopu ovog projekta bit će očišćen teren i uklonjeno rastinje, ručno iskopan teren, položene cijevi i ispitan cjevovod nakon montaže.

Ovaj projekat koštat će oko 24.000 KM i finansirat će ga Općina Stari Grad. Izvođač radova je firma „SET INVEST“.

Dvije nove hair – česme



Hair-česma na Hridu

Dvije hair - česme izgrađene su u Općini Stari Grad. Jedna je podignuta u Mjesnoj zajednici Mošćanica, a druga u Mjesnoj zajednici Hrid - Jarčedoli.

Obje česme podigle su porodice rahmetlija, dok je Općina Stari Grad obezbijedila svu tehničku i administrativnu podršku.

Česmu u Mjesnoj zajednici Hrid – Jarčedoli, kod džamije SAGR Hadži Ali, za dušu rahmetli Adisa Subašića, podigao je Adin Subašić.

Staru česmu Avdagušu u Mjesnoj zajednici Mošćanica u Ulici Sarajevskih gazija kod broja 11 obnovila je Vasva Tahmihčija – Demirović s djecom za dušu rahmetli Dalije Demirovića.

Projekti



Sanacija dijela Ulice Ferhadija

Sanacija Ulice Ferhadija, od apoteke kod Katedrale (na Trgu Fra Grge Martića) do Gradske tržnice, počet će po završetku izrade projekta.

Ovaj dio ulice je oštećen i ploče nisu mijenjane od održavanja Olimpijade u Sarajevu.

Sanacija će podrazumijevati uklanjanje starih ploča, postavljanje betonske podloge i novih ploča. Planirano

je da projekat bude završen do 15. juna. Zamjenu polomljenih ploča finansirat će Općina Stari grad.

Općina Stari Grad u nekoliko navrata je mijenjala popucane ploče u Ferhadiji. Tokom 2010. godine mijenjane su oštećene ploče od Gradske apoteke do Sarača. Kroz projekat tekućeg održavanja Općina je redovno mijenjala popucane ploče u Ferhadiji.

Uređenje puta od Zlatišta do Brusa

Projekat čišćenja i uređenja pojasa uz regionalni put Kula - Bistrica i na dijelu Trebevića, dionica Zlatište – Širokača, zajedno će finansirati Općina Stari Grad i Opština Istočni Stari Grad.

Definisano je ovo u Sporazumu o čišćenju i održavanju puta kojeg su 1. februara, 2012. godine potpisali Ibrahim Hadžibajrić, načelnik Općine Stari Grad i Bojo Gašanović, načelnik Opštine Istočni Stari Grad.

Ovaj put je zapušten i u lošem je stanju. Na cijeloj dionici nalazi se otpad i rastinje, a asfalt je potrebno sanirati.

Hadžibajrić je pojasnio da ovo nije prvi projekat kojeg zajedno realizuju Stari Grad i Istočni Stari Grad.

„Prošle godine Općina Stari Grad i Istočni Stari Grad zajedno su finansirali uređenje dijela puta Zlatište - Širokača. Zajedničkim snagama okončan je i projekat elektrifikacije u selu Mešinovići, kao i asfaltiranje nekoliko puteva“, kazao je Hadžibajrić.



S potpisivanja Sporazuma

Bojo Gašanović, načelnik Opštine Istočni Stari Grad, istakao je kako će put od Zlatišta do Brusa biti saniran u dužini od oko šest kilometara.

„Ovaj dio puta je zarastao rastinjem, puno je smeća, a i saobraćajnica je u jako lošem stanju“, kaže Gašanović, naglasivši kako je cilj ovog projekta prije svega revitalizacija, razvijanje i oživljavanje Trebevića kao turističke destinacije.

Vrijednost ovog projekta je 41.886 KM, od čega će Općina Stari Grad Sarajevo obezbijediti 35.000 KM, a Opština Istočni Stari Grad 6.886 KM.

Smještaj za 11 interno raseljenih porodica

Nova zgrada na Brusuljama, namijenjena za smještaj interno raseljenih porodica, umjesto deset, imat će 11 stanova.

Prema informacijama iz Službe za stambene poslove Općine Stari Grad projekat za gradnju zgrade u Brusuljama je izmijenjen. Umjesto deset stanova, koliko je prvobitno bilo planirano, zgrada će imati 11 stanova.

„Pravobranilaštvo Općine Stari Grad, imajući u vidu izmjenu projekta, podnijelo je zahtjev za izmjenu urbanističke saglasnosti. Podnijeli smo zahtjev i za građevinsku dozvolu“, pojasnili su u Službi za stambene poslove Općine Stari Grad.

Za gradnju nove zgrade u Brusuljama u budžetu Općine planirano je 100.000 KM. Ministarstvo za rad, socijalnu politiku, raseljene osobe i izbjeglice Kantona Sarajevo osiguralo je također 100.000 KM.

„U ovoj zgradi bit će smješteno 11 interno raseljenih porodica za koje Općina Stari Grad plaća sekundarni smještaj“, istakli su u Službi za stambene poslove.

Devet interno raseljenih porodica s područja Starog Grada sredinom oktobra prošle godine su dobili ključeve od svojih stanova u novoizgrađenoj zgradi u Brusuljama. Izgradnja ovog objekta koštala je oko 600.000 KM.



Nova zgrada u naselju Brusulje

Nova kanalizacija u naselju Vratnik



Kvalitetnija kanalizacija za Vratničane

Rekonstrukcija kanalizacione mreže u Ulici Mejdan-Carina u starogradskoj Mjesnoj zajednici Vratnik je u toku.

U sklopu ovog projekta bit će postavljena primarna i sekundarna kanalizaciona mreža, odnosno stari kanalizacioni sistem bit će zamijenjen novim separatnim. Nova kišna i fekalna kanalizaciona mreža bit će postavljena u dužini od oko 850 metara.

„Mrežu rekonstruišemo na dionici od Ulice Mejdan do Nevjestine mahale. Gornji dio ulice od Mejdana do džamije

je završen. Na tom dijelu položene su kanalizacione cijevi u dužini od oko 300 metara,“ pojasnio je Alen Robović, tehnički direktor firme „Harysco“.

Ulica će, nakon rekonstrukcije kanalizacione mreže, biti asfaltirana.

Projekat će koštati 470.000 KM. Finansirat će ga preduzeće „Vodovod i kanalizacija“ i to kreditom Svjetske banke. Izvođač radova je firma „Harysco“.

Od ovog kredita prošle godine završena je rekonstrukcija kanalizacione mreže u ulicama Arapova i Pirin brijeg.

Toplije učionice u hridskoj školi



Novo grijanje u školi

Rekonstruisan je sistem grijanja u Osnovnoj školi „Šejh Muhamed ef. Hadžijamaković“ u Mjesnoj zajednici Hrid – Jarčedoli.

Stara razvodna mreža centralnog grijanja je bila dotrajala, pa je rekonstruisana. Ranije je centralno grijanje bilo postavljeno dužinom cijele škole ispod betonske ploče i zbog nepristupačnosti bilo je onemogućeno njegovo održavanje. U sklopu rekonstrukcije postavljeno je 500 metara nove centralne mreže grijanja ispod stropa, koje je dostupnije za održavanje, a samim tim i puno kvalitetnije. U sklopu ovog projekta urađena je i zamjena dotrajalih ventila u kotlovnici.

Vrijednost projekta bila je oko 19.200 KM, a finansirali su ga, u omjeru pola-pola, Općina Stari Grad i Ministarstvo obrazovanja i nauke Kantona Sarajevo.

Izvođač radova bila je firma „Termo projekt“.

Nova ograda oko Doma Logavina



Postavljena nova ograda

Uređena je ograda ispred Doma kulture Logavina u istoimenoj starogradskoj mjesnoj zajednici.

Također je postavljena nova ograda na mjestima gdje je nedostajala. Pored toga, izrađena je i postavljena kapija na ulazu u dom kulture, te popravljena već postojeća ograda.

Popravka ograde koštala je oko 1.000 KM. Finansijer je bila Općina Stari Grad, a izvođač radova firma „Amek“.

Intervju: Amina Deljković, pomoćnica načelnika za obrazovanje, kulturu i sport

Kvalitetan odgojni rad u školama

Na takmičenjima iz znanja, koje organizuju kantonalno i federalno Ministarstvo obrazovanja i nauke, starogradski učenici postižu izuzetne rezultate, kazala Deljkovićeva

O pćina Stari Grad ove godine će, posredstvom Službe za obrazovanje kulturu i sport, po prvi put stipendirati nadarene studente i učenike, najavila je Amina Deljković, pomoćnica načelnika za obrazovanje, kulturu i sport.

Osim ove, uvedeno je niz novina koje će u narednom periodu realizovati Služba za obrazovanje, kulturu i sport.

„Služba će, kao i prethodnih godina, podržati mnogobrojne projekte iz oblasti obrazovanja, kulture i sporta“, rekla je Deljkovićeva.

□ **Od prošle godine ste pomoćnica načelnika za obrazovanje, kulturu i sport. Šta je posao ove Službe?**

Sam naziv Službe govori koje su oblasti prioritet u njenom radu. Služba prati rad osnovnih škola, analizira uspjeh u učenju i vladanju učenika, prati i podstiče realizaciju godišnjeg programa rada škola, razmatra izvještaje osnovnih škola o radu i uslovima rada i aktivno se uključuje na poboljšanje prostornih i materijalnih uslova svih obrazovnih institucija u našoj Općini. Služba koordinira saradnju između obrazovnih institucija, u saradnji s Ministarstvom obrazovanja i nauke KS organizuje takmičenja i smotre učenika iz oblasti nastavih i vannastavnih aktivnosti, javne i kulturne manifestacije škola u oblasti sporta, umjetnosti, obrazovanja, saraduje sa institucijama nauke i kulture i sportskim klubovima i aktivno učestvuje u realizaciji mnogih projekata.

Novine i projekti

□ **Uveli ste i određene novine. Možete li objasniti o čemu je riječ?**

Služba je angažovana na izradi strategije. Jedna od novina je projekat stipendiranja nadarenih učenika i studenata. Napravili smo Pravilnik i utvrdili kriterije za stipendiranje nadarene djece i realizacija ovog projekta počela je u ovoj godini. Provodimo projekat besplatne edukacije mladih za profesionalno usmjerenje. Ciljna grupa su starogradski osnovci, srednjoškolci i studenti. Edukacija će obuhvatiti devet različitih obla-

sti. Projekat je iniciralo Udruženje „KAP“. Podržali smo ovaj projekat jer znanja i vještine koje traže poslodavci nisu zastupljeni u redovnom obrazovanju.

svoje znanje prezentirati na način na koji žele. U toku su pripreme za organizovanje besplatne škole slikanja za naše učenike i studente. Školu će voditi akademski



Amina Deljković, pomoćnica načelnika

Tu je i novi način organizovanja kviza znanja o kulturno-historijskim znamenitostima. Do sada je bila praksa da Služba odredi temu iz oblasti kulturno-historijskog naslijeđa koju su učenici s nastavnici dodatno obrađivali. Potom su se takmičili ko će pokazati više znanja o toj temi. Učenici su se iscrpljivali učeći

slikar Irfan Hozo.

□ **Koji projekti će biti prioriteta u radu Službe u narednom periodu?**

U saradnji sa Sportskim savezom slijepih i slabovidnih KS organizovat ćemo Međunarodni globalni turnir. Realizacijom ovog projekta želimo da unaprijedimo svijest djece i omladine o problemu „bijelog štapa“. Veliku pažnju posvetit ćemo pripremama za izgradnju sportskih terena, sportskih sala pri školskim objektima. U toku su i pripreme projekta „Novi krovovi i prozori za najstarije sarajevske škole“. Namjera nam je da rekonstruišemo krovove i zamijenimo prozore u OŠ „Mula Mustafa Bašeskija“, „Edhem Mulabdić“ i „Saburina“. Menadžment škola pomoć je tražio od Ministarstva obrazovanja i nauke KS, ali nikad nisu dobili povratnu informaciju. Općina je pristupila izradi projekta „Novi krovovi i prozori za najstarije sarajevske škole“ kojim će aplicirati na fondove EU i druge međunarodne institucije. Tu je i projekat „I mi imamo pravo da se obrazujemo“ kojeg ćemo realizovati sa Zavodom za specijalno obrazovanje i odgoj djece „Mjedenica“. Neizostavan je projekat „Banka koštane srži BiH“. Svakodnevno u medijima čitamo tekstove

Biografija

Amina Deljković rođena je u septembru, 1964. godine u Sarajevu. Osnovnu školu, Prvu gimnaziju, Gazi Husrev-begovu medresu i Pedagošku akademiju završila je u Sarajevu, a Pedagoški fakultet u Mostaru. Prošle godine stekla je zvanje magistricе menadžmenta iz oblasti Upravljanja kvalitetom u obrazovanju na Ekonomskom fakultetu u Sarajevu. Od 1990. radila je kao učiteljica u starogradskim osnovnim školama, a od 2002. godine bila je direktorica Osnovne škole „Hamdija Kreševljaković“. Od oktobra, 2011. godine pomoćnica je načelnika Općine Stari Grad.

napamet sve pojedinosti iz ponuđenih oblasti. U novom pristupu učenici sami mogu odabrati temu koju će obraditi, te će

o oboljelim građanima koji prikupljaju novac za liječenje u inostranstvu. Nerijetko se dešava da izgube bitku za život jer je prikupljanje novca dugotrajan i mukotrpan posao. I ove, kao i prethodnih godina, podržat ćemo projekte iz oblasti kulture: Sarajevo film festival, Bašćaršijske večeri, Dani poezije, Međunarodni festival folklor.

Akademija za građane

□ *Općina Stari Grad uključit će se u projekat „Akademija za građane“, kojeg realizuje Misija OSCE-a u BiH. O kakvom projektu je riječ?*

Ovaj projekat već drugu godinu zaredom u saradnji s lokalnim zajednicama organizuje Misija OSCE-a u BiH. Projekat je namijenjen stanovnicima. Cilj mu je da poveća transparentnost rada lokalnih zajednica, educira građane o nadležnosti općine, odnosno šta mogu tražiti i očekivati od općine, ali i o načinima da se uključe u rad općine i doprinesu njenom kvalitetnijem radu. Planirano je da projekat traje dva mjeseca, odnosno da bude organizovano osam predavanja o radu lokalne zajednice, nakon čega će građanima biti dodijeljeni certifikati o završenoj edukaciji.

□ *Do prelaska u Općinu bili ste direktorica OŠ „Hamdija Kreševljaković“. Možete li napraviti paralelu između ova dva posla?*

Proteklih devet godina bila sam direktorica OŠ „Hamdija Kreševljaković“. To je vrlo odgovoran, težak i stresan posao koji ima i svoje lijepe strane. Kao direktorica bila sam odgovorna za sve; za funkcionisanje odgojno-obrazovnog procesa, uslove rada, nivo učeničkih postignuća, ponašanje i sigurnost učenika. Od mene se očekivalo da osiguram maksimalne uslove za rad, nagradim nastavnike za svaki postignuti rezultat ili prekovremeni rad, a za to resorno ministarstvo nikad nema novaca. Zbog toga sam rekla da je to težak i stresan posao. Lijepa strana tog posla je rad s djecom koja su iskrena, topla i neiskvarena. To je neprocjenjivo iskustvo i to mi nedostaje. Nedostaje mi i

nekolicina prijatelja koji su ostali u školi i sad ih rjeđe viđam. Posao u Općini je kreativan, raznolik i zanimljiv. Na indirektan način sam uključena u rad škola. Također, saradujemo s NVO, sportskim klubovima, institucijama kulture. Posla ima puno, ali stručan i vrijedan tim ljudi koji radi u Službi stiže kvalitetno odgovoriti na sve postavljene zadatke.

Uspjeh učenika

□ *Dugo vremena porovali ste u prosvjeti. Jeste li zadovoljni stanjem školskih objekata i rezultatima koje postižu starogradski osnovci?*

Zadovoljni smo rezultatima koje postižu naši osnovci. Najvažnije nam je da je odgojni rad s djecom kvalitetan. S pravom ovo tvrdim jer je malo drastičnih disciplinskih mjera izrečeno učenicima. Na polugodištu ove školske godine svega osam, od više od 2.800 osnovaca, imalo je loše vladanje. Na takmičenjima iz znanja, koje organizuju kantonalno i federalno Ministarstvo obrazovanja i nauke, učenici postižu izuzetne rezultate. Prošle godine naši učenici su zabilježili zavidne rezultate iz takmičenja iz fizike i matematike. Radili smo analizu uspjeha upisa osnovaca u srednje škole. Visok je pro-

cenat učenika koji su se upisali u željene škole. Ovo su pokazatelji da su odgoj, obrazovanje, ali i rukovodstvo i nastavni kadar kvalitetni. Međutim, školski objekti u Starom Gradu su u lošem stanju. U njihovo održavanje ministarstvo ulaže malo novca. Ministarstvo ima mačehinski odnos prema školama u Starom Gradu. To odgovorno tvrdim jer sve ključne probleme koje imaju naše škole nisu rješavali na adekvatan način. Često kažu kako imamo malo djece i to im ne može i ne smije biti isprika. Bez obzira koliko imamo djece moramo im obezbijediti normalne uslove za rad. Koliko je situacija alarmantna govori i podatak da su neke naše škole pokrivene azbestom koji se od 70.-ih godina ne proizvodi jer je štetan za zdravlje ljudi.

Milioni za škole

□ *Koliko je novca obezbijedeno za školske objekte?*

Općina je sa oko 1,5 miliona KM podržala izgradnju nove škole u naselju „Sedrenik“, a s 500.000 KM uređenje školskog prostora. Unutrašnje uređenje sale u OŠ „Vrhbosna“ koštalo je 70.000 KM. Učestvovali smo i u dogradnji ovog školskog objekta. S 35.000 KM sufinansirali smo postavljanje umjetne trave na sportskom terenu u OŠ „Hamdija Kreševljaković“. Općina je osigurala oko 10.000 KM za rekonstrukciju grijanja u OŠ „Šejh Muhamed ef. Hadžijamaković“.

□ *Općina Stari Grad svakodnevno pomaže rad obrazovnih institucija. Na koji način se ogleda ova pomoć?*

Općina pomaže obrazovni sistem na više načina: u rekonstrukciji školskih objekata, realizaciji odgojno-obrazovnog procesa, opremanju učionica i biblioteke i direktnoj pomoći učenicima. Nagradujemo učenike koji se zalažu u učenju i takmičenjima, stipendiramo nadarene i učenike koji su pripadnici boračkih populacija, djeci koja su u stanju socijalne potrebe plaćamo užine, ekskurzije, odlazak u školu u prirodi, obezbjeđujemo novac za nabavku besplatnih udžbenika. Za djecu s poteškoćama u razvoju i njihovim pratiocima plaćamo prevoz. Organizujemo besplatnu školu skijanja za osnovce i plaćamo prevoz za djecu koja pohađaju školu plivanja.



Deljkovićeva sa svojim saradnicima

Požar

Požar uništio desetak trgovki

Općina Stari Grad finansirat će sanaciju krovova svih objekata uništenih u požaru koji je u centru Bačšaršije izbio početkom marta, ove godine.

Najavio je ovo Ibrahim Hadžibajrić, načelnik Općine Stari Grad.

Desetak radnji u Ulici Trgovke nastradale su u požaru koji je 7. marta, 2012. godine izbio u centru Bačšaršije.

"Napravljena je procjena sanacije uništenih krovova. Šteta iznosi oko 75.000 KM. Općina će finansirati sanaciju krovova svih objekata i onih koji su u njenom vlasništvu i privatnih radnji", kazao je Hadžibajrić.

Dodao je kako će Općina sanirati unutrašnjost svojih trgovki, dok će troškove sanacije privatnih radnji morati snositi sami vlasnici.



Trgovke u plamenu

Uzrok požara i visina materijalne štete na svim objektima još nisu poznati. U ovom požaru tri radnje su potpuno izgorjele. Osim radnji koje su uništene u požaru nastra-

dale su i trgovke koje su se nalazile u njihovoj blizini. Voda, kojom su vatrogasci gasili požar, probila je u susjedne objekte i u velikoj mjeri ih uništila.

Požar u centru Bačšaršije su gasila 64 vatrogasca i 13 vatrogasnih vozila. Osim vatrogasaca na lice mjesta izašao je načelnik Hadžibajrić, te predstavnici "Elektrodistribucije", "Sarajevogasa" i "Vodovoda i kanalizacije".



U akciji 64 vatrogasca i 13 vozila



Slijedi sanacija krovova

Požari u Sarajevu kroz historiju

Piše: Mufid Garibija, sarajevski arhitekt i poznavalac historije grada

Sarajevo, odnosno dolina sarajevskog polja, nekad zvano „mjesto sokolova“, od samog je postanka bilo mjesto svraćanja trgovaca, a naročito je interesovalo Rimljane. Ova dolina imala je burnu historiju sa elementarnim nepogodama, ratovima, bolestima. Požari su se, s vremena na vrijeme, javljali u Sarajevu, a duge zime Rimljane su otjerale iz grada. Požare su obično podmetali protivnici koji su Sarajevo htjeli pokoriti. Bilo je i onih koji su nastajali iz nehata.

Urbanu kasabu, koja je zauzimala današnji Stari Grad i bila trgovačko središte regije, podigao je Isa-beg Ishaković. Ovaj sklad prvi je narušio Vuk Jajčanin koji je djelimično porušio i zapalio Sarajevo.

Tada je najviše stradala Čaršija.

U vremenu Gazi Husrev-beg, sredinom XVI. vijeka kada je Sarajevo bilo velegrad, pojavio se Mađar Eugen Savojski, veliki neprijatelj Osmanskog carstva, a posebno Sarajeva. Znajući da je sarajevska vojska bila na ratištu u zapadnim dijelovima turskog carstva, 1697. godine Savojski je ušao u Bosnu. Zapalio je sve u Sarajevu, osim Begove džamije i dijela današnjega Vratnika gdje je bio zaustavljen.

Drugi najveći požar u Sarajevu iz nehata je izbio 8. augusta. 1879. godine. Požar je izbio u kući Sime Sokolovića u današnjem Latinluku, blizu Latinskog mosta. Trgovac Švarc, radeći sa špiritom i svijecom, zapalio je kuću iz nehata. Požar je zahvatio



Mufid Garibija

okolne objekte i proširio se cijelom Čaršijom, pa su tako izgorjela 434 dućana, mnogo kuća i najpoznatiji hanovi. Stradala je Kolobara, Tašlihan i drugi hanovi.

Ovaj požar je natjerao vlasti da uvedu red i kroz regulacioni plan i potrebne dozvole počnu rekonstrukciju. Prije ovog požara slučajno je najčešće gorio Tašlihan ili Gazi Husrev-begov han, i to 1788. i 1831. godine.

Vatra, kao jedan od najvećih neprijatelja Sarajeva, u Čaršiji je izbila ponovo u decembra 1957. godine kada se zapalio Morića Han. To je bio najveći požar na Bačšaršiji za vrijeme Titove Jugoslavije. U zimu 1973. godine, na mjestu današnjeg „Agrokomerca“, izbio je požar koji je ponovo sve uništio.

Ambasador Hrvatske zasadio 111-u lipu

Ambasador Hrvatske u BiH Tonči Staničić 19. januara zasadio je „svoju“ lipu.

Ovo je 111. lipa u Aleji ambasadora, koju su u proteklom periodu zasadili akreditovani ambasadori u BiH i visoki zvaničnici međunarodnih organizacija. Ceremoniji sadnje lipe, osim ambasadora, prisustvovao je Rizah Avdić, predsjedavajući Općinskog vijeća Stari Grad.

Staničić je kazao kako je sam čin sadnje lipe simboličan i pokazuje dobre odnose susjednih država BiH i Hrvatske. Zadovoljan je odnosima između BiH i Hrvatske, koje su u ekonomskom i političkom smislu bitne jedna drugoj.

Predsjedavajući Avdić istakao je kako je Staničić imao čast da bude prvi ambasador koji je u 2012. godini zasadio lipu u Aleji ambasadora.

„Sadnjom lipe, koja je simbol života



Predsjedavajući i ambasador zasadili lipu

i prijateljstva, učvršćujemo odnose između BiH i Hrvatske“, kaže Avdić.

Predsjedavajući je ambasadoru uručio certifikat i skicu Aleje ambasadora sa svim zasađenim lipama.

Saradnja Maribora i Općine Stari Grad



Delegacija Maribora i Ambasade Slovenije u posjeti Općini

Grad Maribor pružit će podršku Općini Stari Grad u pripremi projekata za apliciranje na fondove Evropske unije.

Zaključeno je ovo na sastanku kojem su 8. marta, 2012. godine prisustvovali predstavnici Ambasade Slovenije u BiH, Grada Maribora i Općine Stari Grad.

Domaćini sastanka bili su Diana Salihbegović, sekretar organa državne službe i Zlatan Mesić, savjetnik općinskog načelnika.

Franc Kangler, gradonačelnik Mari-

bora, istakao je kako će se ova pomoć ogledati prevashodno u edukaciji kadra Općine Stari Grad u pisanju projektnih prijedloga za javne pozive EU.

Podsjetio je kako je Maribor iz fondova EU povukao značajan novac kojim je finansirao 49 projekata.

Saradnja u ovoj oblasti rezultat je Protokola o privrednoj i kulturnoj saradnji između Općine Stari Grad i Maribora, koji je potpisan u septembru, 2010. godine.

Opća uprava

Pravna pomoć



Šalter sala

Uposlenici Službe za opću upravu Općine Stari Grad u 2011. godini primili su 3.597 građana s ciljem pružanja besplatne pravne pomoći.

Pravna pomoć građanima je pružena u različitim oblastima s ciljem ostvarivanja njihovih prava u nadležnim općinskim službama.

„Pružanje pomoći uglavnom se odnosilo na davanje uputstava o prikupljanju potrebne dokumentacije za ostvarivanje prava građana u postupku urbanističke saglasnosti, upisa u matične knjige rođenih, o pitanjima u oblasti boračko-invalidske zaštite, ali i određenim oblastima koje realizuje Policijska uprava“, saopćeno je iz Službe za opću upravu.

Matični ured

Tokom 2011. godine u Općini Stari Grad sklopljeno je 225 brakova. Naknadno su upisana 32 braka i to za građane koji su se vjenčali u inostranstvu.

Informisanje



Službenik za informisanje

Službeniku za informisanje u protekloj godini obratio se 491 građanin sa zahtjevom za pristup informacijama u Općini Stari Grad. U okviru rješenja o odobrenju pristupa informacijama urađene su 2.263 kopije, za šta je naplaćeno 226,50 KM. Pored toga, Služba za Opću upravu izdala je 515 uvjerenja o podnesenoj legalizaciji.

Sedam miliona KM od zakupnina



Od zakupnina oko sedam miliona

Služba za privredu Općine Stari Grad tokom 2011. godine od izdavanja poslovnih prostora naplatila je 7.100.394,87 KM.

Naplata zakupnina u 2011. godini veća je za 29,23 odsto ili za 1.606.076,56 KM u odnosu na 2009. godinu, odnosno za 1,09 odsto ili za 76.274,86 KM u odnosu na 2010. godinu. Tokom 2011. godine ukupno je naplaćeno 1.926.375,94 KM starog duga.

„Naplata zakupnina po osnovu izdavanja poslovnih prostora u decembru 2011. godine iznosila je 598.140,14 KM i za 14,49 odsto ili 101.337,41 KM manja je u odnosu na decembar, 2010. godine. U decembru prošle godine naplaćeno je 201.923 KM starog duga“, saopćeno je iz Službe za privredu Općine Stari Grad.

Više od 500.000 KM za korištenje javnih površina



Pola miliona od javnih površina

Služba za komunalne poslove i investicije Općine Stari Grad je tokom 2011. godine naplatila 509.824,70 KM za korištenje javnih površina.

Naplata se odnosi za sve kategorije korištenja javnih površina u Općini Stari Grad. Riječ je o baštama ispred ugostiteljskih objekata, slobodnostojećim ljetnim baštama, kioscima, stalnim i tezgama za novogodišnje praznike, promocije, manifestacije, zabavne sadržaje, kao i tezgama ispred trgovinskih i zanatskih radnji.

Budžetom za 2011. godinu planirani iznos naknade za zauzimanje javne površine bio je 450.000 KM, što je po podacima ove Službe i realizovano.

Obrazovanje

Stipendije za starogradske studente i srednjoškolce

Studenti i srednjoškolci, pripadnici boračkih populacija, 10. februara, 2012. godine potpisali su ugovor o stipendiranju u školskoj 2011./2012. godini.

Stipendiju tokom ove školske godine primit će 61 student i 51 srednjoškolac. Mjesečna stipendija za studente iznositi će 120 KM, a za srednjoškolsce 80 KM.

Ugovore s predstavnicima Općine Stari Grad potpisalo je 112 studenata i srednjoškolaca. U ime Općine Stari Grad ugovor je s korisnicima stipendija potpisao Ismet Hadžić, savjetnik općinskog načelnika.

I ove godine stipendije su dobila djeca demobilisanih boraca, ratnih vojnih invalida, šehidskih, odnosno, porodica palih boraca, koja se redovno školuju u srednjim školama i fakultetima Univerziteta u Sarajevu.

Konkurs za stipendiranje učenika i studenata za školsku 2011./2012. godinu raspisan je u oktobru prošle godine. Pravo učešća na konkursu imala su djeca demobilisanih boraca, ratnih vojnih invalida i šehidskih odnosno porodica palih boraca, koji su na redovnom školovanju u srednjim školama i fakultetima u Kantona Sarajevo.



S potpisivanja ugovora

Općina podržala projekat „Akademija za građane“



Edukacija građana o radu lokalne zajednice

Općina Stari Grad uključila se u projekat „Akademija za građane“ kojeg već drugu godinu u saradnji s lokalnim zajednicama realizira Misija OSCE-a u BiH.

Projekat „Akademija za građane“ namijenjen je stanovnicima općina. Cilj mu je da poveća transparentnost rada lokalnih zajednica, ali i znanje građana o poslovima koje obavljaju organi vlasti i javna preduzeća.

Projekat će trajati dva mjeseca u sklopu kojih će biti organizovano osam

predavanja o radu lokalne zajednice. Građani će nakon završenih predavanja o radu lokalne zajednice dobiti certifikate.

Ibrahim Hadžibajrić, načelnik Općine Stari Grad, jednom sedmično prima građane. U zadnje tri godine načelnik Hadžibajrić je primio više od 6.000 građana, a svake sedmice posjećuje i mjesne zajednice. Građani o radu Općine informišu se i putem lista „Starogradski Haberi“, ali i posredstvom zvanične web stranice koja je dnevno ažurirana.



Hadžibajrić i Deljkovića s polaznicima škole skijanja

Diplome za uspješno okončanu školu skijanja

Diplome o uspješno završenoj školi skijanja dobilo je 120 starogradskih osnovaca.

Diplome polaznicima škole skijanja 14. januara, 2012. godine uručili su Ibrahim Hadžibajrić, načelnik Općine Stari Grad i Amina Deljković, pomoćnica načelnika za obrazovanje, kulturu i sport. Ceremonija uručivanja diploma bila je organizovana na Velikom polju na Igmanu, gdje je i bila organizovana škola skijanja.

Ove godine škola skijanja počela je 9. januara, 2012. godine i Općina Stari

Grad ju je finansirala s 10.000 KM. Besplatna škola skijanja obezbijedena je za 120 djece uzrasta od devet do 11 godina.

Školu skijanja već tradicionalno za svoje najmlađe stanovnike Općina Stari Grad organizuje posredstvom Službe za obrazovanje, kulturu i sport. Tehničku pomoć u realizaciji ovog projekta pružio je Ski klub „Širokača“.

Općina Stari Grad 12-u godinu za redom finansira školu skijanja za učenike osnovnih škola. Do sada je školu skijanja uspješno završilo više od 5.000 djece.

FK „Sarajevo“ pobjednik Turnira „Asim Ferhatović Hase“

Fudbalski klub „Sarajevo“, pobjedom nad selekcijom Austrije, osvojio je prvo mjesto na 19-om Međunarodnom malonogometnom turniru „Asim Ferhatović Hase“.

Drugo mjesto pripalo je selekciji Austrije, dok je trećeplasirana bila srbijanska ekipa iz Vojvodine.

Za najboljeg igrača na ovom turniru proglašen je Kenan Handžić, igrač FK „Sarajevo“, kojemu je ujedno i pripala čast da ponese epitet igrača koji najviše podsjeća na nogometnu legendu rahmetli Asima Ferhatovića Hasetu. Emir Plakalo, također iz FK „Sarajevo“, proglašen je najboljim golmanom. Nagrada za fair-play pripala je albanskoj ekipi „Kastrioti“.

Ovogodišnji Međunarodni turnir u malom nogometu „Asim Ferhatović Hase“ počeo je 24. decembra, 2011. godine utakmicom između selekcije Prijepolja i Fudbalskog kluba „Sarajevo“. Na turniru je učestvovalo osam ekipa iz



Pobjednička ekipa FK "Sarajevo"

BiH, Srbije, Albanije i Austrije. U grupi „A“ učestvovala su ekipe „Mostar – Stari Grad“, selekcija Prijepolja, Kastrioti (Albanija) i FK Sarajevo, a u grupi „B“ FK „Željezničar“, FK „Vratnik“, selekcije Vojvodine i Austrije.

Međunarodni turnir u malom nogometu organizovao je Fudbalski klub Vratnik uz pokroviteljstvo Općine Stari Grad, u znak sjećanja na nogometnu legendu i plemenitog čovjeka Asima Ferhatovića Hasetu.

Godišnjica nezavisnosti Albanije



Obilježena nezavisnost Albanije

Ibrahim Hadžibajrić, načelnik Općine Stari Grad, 23. januara, 2012. godine je u Ambasadi Albanije u BiH otvorio izložbu albanskih slikara.

Izložba je postavljena povodom obilježavanja stote godišnjice nezavisnosti Albanije.

Riječ je o izložbi umjetnika Mustafe Arapia, Burona Kacelija, Marijane Gadžhabeliu i Fatmira Carkanja o glavnom gradu Bosne i Hercegovine. Tokom sedmodnevnog boravka u Sarajevu albanski umjetnici skupljali su impresije o ovom gradu i prenijeli ih na platno.

Osim načelnika Hadžibajrića otvaranju izložbe prisustvovao je Flamur Gashi, ambasador Albanije u BiH, kao i mnogobrojne javne ličnosti iz BiH.

Riješeno oko 2.000 predmeta



Služba za urbanizam

Služba za urbanizam Općine Stari Grad u protekloj godini zaprimila je 1.492, a riješila 1.955 predmeta.

Ova Služba je u 2011. godini imala ukupno 3.241 predmet u postupku rješavanja, od čega je u prošloj godini primila 1.492 nova predmeta, dok je iz prethodnih godina bilo preneseno 1.749 predmeta.

„Uposlenici Službe su u 2011. godini riješili 1.955 predmeta. Ova Služba je u 2011. godini primila 1.492, a riješila 1.955 predmeta. To znači da je u prethodnoj godini riješila 463 predmeta više nego što je zaprimila u istom periodu“, saopćeno je iz Službe za urbanizam Općine Stari Grad.

Zahvalnica osnovaca



Svečanost u OŠ "Sedrenik"

Učenici područne Osnovne škole „Sedrenik“ su 11. januara, 2012. godine, uz pomoć nastavnika i odgajatelja, pripremili svečani program kako bi se zahvalili svima koji su doprinijeli u izgradnji nove škole na Sedreniku

Počasni gost prijema bio je načelnik Općine Stari Grad Ibrahim Hadžibajrić, koji je dobio i zahvalnicu za nesebičnu podršku prilikom izgradnje i pripreme za rad područne škole „Sedrenik“.

„Drago mi je da sam ovdje s vama. Zahvaljujem se roditeljima koji su došli da uveličaju ovu svečanost. Općina će nastojati da u proljeće završi i vanjsko uređenje oko škole, čime će biti zaokružen cijeli projekat izgradnje škole“, izjavio je Hadžibajrić.

Sjećanje na naše kolege

Edina Arnautović
(1956.-2011.)

Preselila na Ahiret 5. februara 2011. godine. U Općini Stari Grad bila je zaposlena od 1998. godine. Radila je u Službi za komunalne poslove i investicije.



Avdo-Hamdo Hamzić
(1949.-2011.)

Preselio na Ahiret 27. decembra 2011. godine. U Općini Stari Grad bio je zaposlen od 1994. godine. Radio je u Službi za civilnu zaštitu.



Nermina Bjelak
(1972.-2012.)

Preselila na Ahiret 6. marta 2012. godine. U Općini Stari Grad bila je zaposlena od 2011. godine. Radila je u Sektoru za mjesne zajednice.



Sjećanja

Odata počast ubijenim građanima na Markalama

Predstavnici Općine Stari Grad 5. februara, 2012. godine položili su cvijeće i odali počast ubijenim građanima na pijaci Markale.

S agresorskih položaja na području sela Gornji Mrkovići 5. februara, 1994. godine, oko 12,30 sati, ispaljen je minobacački projektil koji je pao na gradsku pijacu Markale. Granata je usmrtila 67 i ranila 142 osobe.

Brojne delegacije, rodbina, prijatelji i komšije okupili su se 5. februara na mjestu masakra kako bi odali počast ubijenim. Učenjem Fatihe i polaganjem cvijeća na spomen-obilježje sjetili su se svih nedužnih građana koji su poginuli tog kobnog dana.



Godišnjica masakra na Markalama

Godišnjica masakra u Isevića sokaku



Sjećanje na osam ubijenih sugrađana

Delegacija Općine Stari Grad 15. januara, 2012. godine položila je cvijeće i odala počast ubijenim građanima u Isevića sokaku kod broja 23.

Na tom mjestu prije 19 godina granata ispaljena s agresorskih položaja ubila je osam Sarajlija među kojima je i dvoje djece, a 19 ih je ranila. Ubijene i ranjene Sarajlije tog dana čekale su u redu za vodu.

U Isevića sokaku u blizini Sarajevske

pivare poginuli su: Ahmet Ahmetspahić, Jasmina Kajanija, Asim Lačević, Azra Lačević, Senad Lagumdžija, Bajro Pinjo, Aferdita Sadikaj i Jasna Šarić.

Na mjestu pogibije okupile su se porodice žrtava i prijatelji, te predstavnici udruženja civilnih žrtava rata koji su odali počast stradalima uz poruku da će građani Sarajeva i Bosne i Hercegovine ostati ustrajni u očuvanju sjećanja na nevine civilne žrtve.

Završeno takmičenje u odbojci

Ekipa Osnovne škole „Saburina“ u kategoriji djevojčica i Osnovne škole „Mula Mustafa Bašeskija“ u kategoriji dječaka pobjednice su odbojkaškog takmičenja Općine Stari Grad.

Drugo mjesto u kategoriji djevojčica pripalo je ekipi OŠ „Hamdija Kreševljaković“, a treće takmičarkama OŠ „Mula Mustafa Bašeskija“. U kategoriji dječaka srebrnu medalju osvojili su učenici OŠ „Saburina“, a bronzanu takmičari OŠ „Hamdija Kreševljaković“.

Odbojkaško takmičenje učenika šest osnovnih škola s područja Starog Grada organizovano je 10. i 11. marta, 2012. godine.

Tri prvoplasirane ekipe dobile su diplome i pehare, a OŠ „Mula Mustafa Bašeskija“ zahvalnicu zbog tehničke podrške pri organizaciji turnira.

Pobjednici općinskog takmičenja učestvovat će na kantonalnom odbojkaškom takmičenju.



Pobjednici idu na kantonalno takmičenje

Šahovski turnir „Jedan je Hase“

Atif Bećirbegović u starijoj kategoriji, Vedin Ćosić, Rijad Burović i Vedad Jašarević u mlađoj grupi i Amna Avdić u kategoriji kadetkinje pobjednici su 24. Memorijalnog turnira „Jedan je Hase“.

Turnir je bio posvećen fudbalskoj legendi i šahovskom zaljubljeniku Asimu Ferhatoviću Hasetu. Turnir je organizovao Šahovski klub „Stari Grad“ 14. januara, 2012. godine pod pokroviteljstvom Ministarstva kulture i sporta Kantona Sarajevo i Općine Stari Grad.

Na turniru je nastupilo 67 takmičara, koji su odigrali pet kola po švicarskom sistemu, te 14 takmičarki. U muškoj konkurenciji u starijoj grupi trijumfovao je Atif Bećirbegović sa 4,5 poena. U mlađoj grupi po 4,5 poena osvojili su Vedin Ćosić, Rijad Burović i Vedad Jašarević.

U ženskoj grupi kadetkinja najbolja je bila Amna Avdić sa 4,5 poena.

Pojedinci su osvojili pehare, najbolji medalje i diplome, a dodijeljene su i šahovske knjige.

Karate klubu „Satori“ 35 medalja

Članovi starogradskog Karate kluba „Satori“ u 2011. godini osvojili su 35 medalje: deset zlatnih, 11 srebrnih i 14 bronzanih.

Nastupili su na mnogobrojnim takmičenjima među kojima su Karate kup Oslobođenja „Memorijal Salih – Salko Ćurić, Festival prijateljstva „Denis Mrnjavac“, Konjic Open 2011., Rama Open 2011.

Klub danas broji oko 70 stalnih članova s kojima radi pet trenera, majstora karatea. Klub radi na tri lokacije: OŠ „Šejh Muhamed ef. Hadžijamaković“, Mjesnoj zajednici „Medrese“ i OŠ „Sedrenik“.


„Cilj nam je da okupimo što veći broj djece i stvorimo im idealan ambijent za treniranje, animiramo ih, edukujemo kroz karate spor, podignemo na veći nivo njihove fizičke aktivnosti koje su neo-

phodne za zdrav razvoj djece školskog uzrasta. Pažnju smo posvetili opštoj socijalizaciji i sve većem problemu otuđenja djece i smanjenih fizičkih aktivnosti zbog njihove 'prezauzetosti' kompjuterskim igrama“, kazao je Vahid Selimbegović, iz Karate kluba „Satori“.



Izuzetan uspjeh članova KK "Satori"

Mehmedalija Mak Dizdar



(Stolac, 17. oktobar, 1917. - Sarajevo, 14. juli, 1971.)

Ono čime se bh. društvo u historiji, posebno onoj XX. stoljeća, može ponositi u svijetu je, bez sumnje, njegovo kulturno-historijsko naslijeđe. Posebno je značajno iz sfere duhovnog ili nematerijalnog naslijeđa. Kratki tekst koji je pred vama ima za cilj da evocira sjećanje na jednog od najznačajnijih protagonista bh. kulturno-umjetničkog bića, na Mehmedaliju Maka Dizdara, koji je u periodu od 1953. do 1962. godine na Bašaršiji živio i djelovao u ambijentalnoj cjelini – Kazandžiluk, Male Daire i Luledžina ulica.

Mak Dizdar, bez imalo dvojbe, jedan je od najznačajnijih pjesnika u cjelokupnoj bh. historiji. Kažimo nekoliko riječi iz biografije ovog velikana.

Rođen je 1917. u Stocu gdje je završio osnovnu školu. U Sarajevu završava gimnaziju (1936.) i već kao svršeni gimnazijalac objavljuje prvu zbirku pjesama „Vidopoljska noć“. Nakon rata radi u „Oslobođenju“ kao urednik, a nakon rada u novinarstvu okreće se više književnosti. U tom smislu, vrijedna pažnje je njegova aktivnost u uređivanju časopisa „Život“ (1964-71.).

Kao njegovu najzapaženiju, rekli bismo krunsku, zbirku pjesama stručnjaci, ali i šira javnost, davno su prepoznali u zbirci „Kameni spavač“ (1966.). Ova zbirka je svojevrsan plod Makovog snažnog usidrenja u bh. biće, u bh. duh! Zbirka „Kameni spavač“ snažan je eho srednjovjekovne Bosne, njene pismenosti i općenito duhovnosti. Mak je ovom zbirkom al' i drugim svojim radovima (Vidi: Antologija starih bosanskih tekstova, Sarajevo, 1997.) afirmisao Bosnu ili još preciznije bh. jezičko naslijeđe (Vidi: "Marginalije o jeziku i oko njega", Život, XIX/11 - 12, Sarajevo, 1970., str. 109-120.). Nažalost, u svoje vrijeme gotovo da je bio sam uz svoj bosanski jezik!

Mak je končinu, kako bi rekli njegovi stari dobri Bošnjani, svog života doživio 1971. godine. Ukopan je u sarajevskom groblju Bare pod stečkom, kako i priliči dobrom Bošnjanimu.

*Alija Ibrović
dip. orijentalist*

Kovači

Mjesna zajednica Kovači smještena je u sjeveroistočnom dijelu Općine Stari Grad. Graniči s četiri mjesne zajednice: Bašçaršija, Medrese, Sumbuluša i Vratnik.

MZ Kovači raspoređene se na oko 2.000 metara kvadratnih sa 22 ulice i ima oko 2.000 stanovnika.

Jedna je od rijetkih mjesnih zajednica koja ja zadržala ambijentalnu arhitekturu, duh njenih graditelja i tvoritelja. Mještani MZ Kovači, unatoč urbanom stilu življenja i modernim građevinama, i danas imaju „pravo na pogled“. Ovakva osmanska arhitektura posebno se zadržala u Džininovoj i Mišćinoj ulici.

Mjesna zajednica Kovači specifična je po svom nazivu. Ime je dobila po zanatu. Prije više stotina godina na ovom terenu interesantne su bile kovačke radionice u kojima su kovači potkivali konje i izrađivali opremu neophodnu za ove životinje.

Osim po svom, MZ Kovači interesantna je i po nazivima ulica, ali i vjerskim i kulturno-historijskim objektima koji se nalaze na njenoj teritoriji.

Svima je već dobro poznata priča o nastanku naziva ulica Mlini i Nadmlini. U MZ Kovači ljudi su koristili mlinove, kroz koje je tekla Mošćanica. Upravo po tim mlinovima ulice Mlini i Nadmlini dobile su nazive.



Džinina ulica

U ovoj MZ danas postoji sedam džamija. Svaka mahala u Kovačima imala je svoju džamiju uz koju je bila izgrađena česma. Nezahvalno bi bilo izdvajati bilo

Savjet Mjesne zajednice

- | | |
|----------------------|-------------|
| 1. Ramiza Bošnjak | Predsjednik |
| 2. Bakir Šikarić | Član |
| 3. Mehmed Telalagić | Član |
| 4. Suada Lokvančić | Član |
| 5. Mustafa Telalagić | Član |

Sjedište: Ul. Džinina br.12
Telefon: 033 531 625
Sekretar MZ: Bisera Sarvan
e-mail: mz.kovaci@starigrad.ba

koju od džamija, jer svaka ima svoje vriednosti i specifičnosti. Ali, ovdje je neophodno spomenuti Mišćinu džamiju koja je karakteristična po svojoj unutrašnjosti. Unutar džamije nalaze se freske Meke i Medine, što se rijetko može naći u islamskim sakralnim objektima.

Specifičnost MZ Kovači ogleda se i u starim mezarjima. Prema saznanjima i




Šehidsko mezarje Kovači

materijalnim dokazima ovdje se nalaze šehidska mezarja iz osmanskog perioda. U ovim mezarjima na pojedinim nišanima uklesane su sablje i vojnici.

Osim starih osmanskih mezarja neizostavno je i Šehidsko mezarje Kovači u kojem su sahranjeni šehidi, borci Armije Bosne i Hercegovine kao i prvi predsjednik BiH Alija Izetbegović. U sklopu ovog mezarja u izgradnji je i Šehidski spomen centar Kovači. Riječ je o izgradnji multimedijalne dvorane, amfiteatra, te zida sjećanja na kojem će se nalaziti imena svih šehida iz rata 1992.-1995. godine.

Jedan od vrijednih spomenika kulture koji se nalazi u MZ Kovači je Hadžišabanovića kuća. Ova kuća sagrađena je sredinom XVIII. stoljeća. Dva puta je gorjela: prvi put 1929., a



Mišćina džamija

drugi put početkom 2009. godine. Vriednost ove kuće bila je u enterijeru i izvorno očuvanim karakteristikama kuće u kojoj je živjela ugledna trgovačka porodica Hadžišabanović. Požari su uništili vrijedne predmete kao što su: perzijski tepih s motivom kraljice od Sabe, ručno rađeno porculansko posuđe staro nekoliko stotina godina, zavjese, rezbarije, minderluci. Kuća je odavala duh jednog vremena i načina na koji je živjela jedna bogata sarajevska porodica. U kući su snimljeni i filmovi „Miris dunja“, „Azra“ i „Valter brani Sarajevo“.

1001 starogradski biser

Početak ili nastavak urbanog razvoja Sarajeva s dolaskom Osmanlija povezujemo sa izgradnjom prvih tekija u njemu. O toj vezi koja postoji između prvih tekija u Sarajevu i njegovom postanku i razvoju pisao je Adem Handžić u svom radu pod nazivom «O ulozi derviša u formiranju gradskih naselja u Bosni u XV stoljeću» objavljenom u POF-u br. XXXI/1981. god. U ovom radu iznesene su bitne povijesne činjenice koje uveliko rasvjetljavaju i pojašnjavaju povezanost prvih tekija s gradovima (koje Osmanlije osnivaju). Ti se gradovi počinju formirati na starim srednjovjekovnim trgovištima i varoškim naseljima. Na taj način nastavlja se razvoj urbanih sredina, ali s jednom novom odlikom, a to je da se naselja razvijaju poprimajući sve više islamsku fizionomiju.

Prve tekije u Sarajevu nisu imale samo funkciju vjerskog karaktera nego i kulturnog, privrednog i sl. Plauzibilan primjer je mevlevijska tekija (il' zavija) Isa-bega Ishakovića na Bentbaši koja se pojavljuje kao: „zavija-musafirhana, tj. humanitarna ustanova, kao tekija-medresa, tj. tekija obrazovna institucija i kao tekija-ured u koju je navraćao visoki predstavnik centralne ahijške zavije. To znači da je ta tekija bila mjesto u kojem se odvijao duhovno-kulturni život i u kojem je planiran privredni razvoj grada, te koordinirao s glavnim centrima koji su na taj razvoj utjecali.“

Dakle, sada je već sasvim jasno zašto u naslovu stoji «Nastanak prvih tekija (musafirhana...) u Sarajevu», jer se prve tekije u Sarajevu pojavljuju i kao musafirhane (ugostiteljska kuća, koja nudi smještaj i hranu putnicima namjernicima) u sklopu koje je bio i imaret (javna dobrotvorna kuhinja u kojoj siromasi, putnici, učenici i drugi dobijaju besplatno hranu). Bez dvojbe, kada je riječ o Sarajevu najbolji primjer sveg navedenog je tekija, ali i vakuf Isa-bega na Bentbaši o kojoj smo detaljnije kazivali u jednom od prethodnih brojeva Starogradskih habera.

Kada govorimo o tekijama valja istaći sljedeću njihovu važnu odliku:

tekije u Sarajevu, ali i diljem onog prostora u kojem je sufijska tradicija bivstvovala, bile su otvorene za

sve ljude bez obzira na njihove identitete – to se vidi jasno (između ostalog) iz činjenice da su imale ulogu musafirhane i imareta. Ta otvorenost razumljiva je imamo li u vidu ono što je rekao Mevlana Dželaluddin Rumi (rođen u Belhu 6. rebiul-evvela 604. ili 29. septembra, 1207. godine, a umro u Konji 5. džumadel-ahira ili 16. decembra, 1273. godine), jedan od najvećih islamskih mistika, poznat i kao osnivač mevlevijskog tarikata čiji pripadnici izvode specifični ples zvani «sema» praćen duhovnom muzikom koja se izvodi poglavito uz «naj»:

*«Dođi, dođi, opet dođi, samo dođi,
i nevjernik makar bio, vatri, kipu
se klanjao, opet dođi,
i tisuću puta da si obećanje
prekršio, opet dođi,
naš dom nije dom beznađa, opet
dođi, samo dođi.»*

Ovi stihovi i more drugih koji su inspirisani temeljnim islamskim vrelima (Kur'anom s jedne i Hadisom i Sunetom s druge

strane) oblikovali su odnos prema čovjeku ma kojeg backgrounda on bio, samo da ima malo ljudskosti i otvorenosti prema drugima i prema sebi samom.

Zato danas govoriti ili pisati o tekijama nije kazivanje koje se isključivo odnosi na ono što jeste striktno vjersko – sakralno. Svaki diskurs o tekijama jeste govor o kulturno-civilizacijskim vrijednostima u najširem smislu tog iskaza.

Iza kraj, bar kao prijedlog za razmišljanje, vis-à-vis predhodno pomenutog pojma – sakralno – valjalo bi se zapitati šta je to uopšte sakralno, a šta profano u kontekstu islamskog svetopogleda, ali i u svakom drugom tradicionalnom?! Odgovor na ovo pitanje Rumi neprestano sugerše u svom poetsko-proznom djelu, pa i u gore navedenim stihovima odgovor se da naslutiti. Na vama je da bistrite vlastite odgovore gdje započinje, a gdje završava sveto – ako ga uopšte možete uokviriti u vlastitom diskursu!

Nastanak prvih tekija (musafirhana...) u Sarajevu



Kaligrafska kompozicija u formi rozete (kružnice), koja se u kaligrafiji naziva Sulejmanov pečat nalazi se u Hadži Sinanovoj (Silahdar Mustafe - paše) tekiji, koja upotpunjava nacionalni spomenik.



„Brze ligure i sanke“



Tradicionalno takmičenje „Brze ligure i sanke“ održano je 18. marta, 2012. godine na Trebeviću. U brzom liguranju i sankanju takmičio se veliki broj djece, a najboljima su podijeljene diplome i nagrade. Mnogobrojni posjetioci zabavili su se uz muziku i roštilj.

